




Eastco ~ Augustus 2011



Met talle voorafgaande e-posse wat heen en weer gestuur is deur Rietvallei se bestuur, besluite wat geneem moes word aangaande toekennings; nominasievorms wat ge-in moes word vir bestuursposte wat vakant geraak het; ens ens ens het die naweek aangebreek nog voor ons kon sê ... mes. Vir Johann en myself het dit tóg lekker tóg vreemd gevoel om só naby aan ons huis te kamp. Oudergewoonte het ons heelik ry-ry gekuier toe ons skielik die afdraaipad na Eastco kry.

D

Vrydagaand het Klaus en Anet ons bederf met pap-en-sous. Sieg het hand bygesit en gesorg dat die vure hoog brand vir die aand se saamkuier. Na boekvat het die koue gesorg dat almal gaan skuiling soek óf vroeg inklim.

Saterdagoggend is daar vroeg opgestaan en die wat nog nie kans gekry het om die AJV stukke deur te werk nie, het dit gou-gou gedoen. Om 10 uur het almal bymekaar gekom en is daar in alle erns met Rietvallei se jaarlikse vergadering begin. Gedurende die vergadering was daar oomblike van erns, vrolikheid asook tranen en diepe gevoelens wat gedeel is. Oom Willem het gesorg vir die diep oomblik toe hy tydens die opening sy lewens-“motto” sowel as 'n gebed vir 'n senior burger voorgehou het (sien die gebed aan die einde van artikel) en tannie Rina het ons na ons sakdoeke laat

gryp toe sy Rietvallei bedank vir die nabye familie wat Rietvallei se lede vir haar en oom Neels is. Die nuwe bestuur is aangewys en 2012 se kampprogram is gefinaliseer.

Dit alles het in 'n oogwink gebeur en daarna kon ons heerlik almal met 'n worsbroodjie en ietsie te drinke saamkuier, waarna die naweek se rus in alle erns begin het.



*Hier word gekuier na nog
'n suksesvolle Rietvallei
AJV*



Willem van

Rensburg het almal wat 4x4's het nader getrek om later die middag hul vernuf te gaan toets. Dit was 'n suksesvolle uitstappie wat vir sommige van die manne 'n eerste was en vir 'n ander was daar 'n hartseer einde toe hy moes toekyk hoe sy duurbetaalde "valet" daarmee heen is.



*Trix vertel die manne hoe
dit gedoen moet word.....*



Sondagoggend is daar lui-lui opgestaan maar die sonnetjie het vinnig gesorg dat daar uitgesien word na die somer met sy warm dae. Ds Marnette het ons soos oudergewoonte op die punt van ons stoele laat sit met haar treffende boodskap en ek haal aan: *"Geluk het heeltemal niks te make met wie jy is of wat of hoeveel jy het nie - dit gaan slegs oor wat jy dink"*. Treffend was dit beslis! Na die erediens waarin ons DISCO jeuggroep (Dit Is Sonder Christus Onmoontlik) ook van hulle laat hoor EN sien het, het ons onsself onder die bome sit gemaak by 'n

tafel met die heerlikste eetgoedjies. So 'n gesamentlike tafel is vol sonde!


Die middag het oudergewoonte gesorg vir luilekker kuiers wat so lank moontlik uitgerek is alvorens daar opgeslaan moes word - die minder lekker deel van die naweek.

'n Baie groot dankie aan elkeen - van die jongste tot die oudste - wat bygedra het tot nog 'n suksesvolle kuiernaweek en AJV vir Rietvallei.

Geskryf deur: EG

Volgende Kampe!!!

- ~ 23/24 Sept by Drie Berge;
- ~ 28/29 Okt by Klein Paradys (Brits)
- ~ 18/19 Nov by De Voetpadkloof (Middelburg)



Die manne raak weer seuns.....



GEBED

Heilige Vader
U ken my
U sien ek word oud
Ek loop nie meer maklik,
En ek kry so gou koud.
Hou my vas in U hand Heer en
Bewaar my van vrees.
Vou my toe in U liefde,
Maak my vol van U gees.
Verhoor my vandag o Heer,
As ek so voor U staan,
Met smeking en dank,
In Jesus se Naam.
Amen

Vrees nie, My kind
Ek is met jou
Ek hou jou vas
Gee vir My jou kwelling,
Gee elke las.
By My is jy veilig.
Wees nou maar stil,
Dat jy kan oud word -
Dit is My wil!
JOU VADER